




Sabtu, 12 Oktober 2020

Ogen: Jop 28: 20-24



Dalan Ku Kepentaren



Manusia nggeluh ibereken biak guna ngusih Dibata selaku tinepana. Dibata mereken perukuren man manusia guna meteh kepentaren e erguna i bas kegeluhenna. Janah Dibata kap ulu kepentaren e. Kuan-kuanen 1: 7 “Guna ndatken pemeteah si pemenana si la banci la lit i bas kalak eme erkemalangen man Tuhan.” Erkemalangen ertina hormat, taat, patuh kempak persuruhan Tuhan. Mehamat ningen e ndalanken printah Tuhan, la tawar-tawaren entah ersung-sung. Kepentaren banci ipindo man Dibata, emaka kepentaren banci sialoken, kepentaren erguna kal bas kegeluhen enda, ergan pe asangkan emas, pirak, intan, kristal, Mutiara bunga karang ras topas (bd. Ay. 15-19). Sabap alu kepentaren mabai perukuren dengen kegeluhenta sikap bagi si ngena ate Dibata, guna ngaloken pasu-pasuNa bas kegeluhenta. Kepentaren e mabai kita meteh kebujuren ras kebenaran ras ndalankensa bas kegeluhen. I japa pe kita perbahanenta bujur, pendahinta benar, seh maka enterem kalak si erngena ate man banta. Kalak pentar ietehna muat keputusan si mehuli guna dirina ras sekelewetna. Rusaha ia lalap ngelakoken Kata Dibata si ajdi sukat-sukat kebenaran e. Kai pe si ilakokenna ipertanggungjawabkenna man Dibata. Dibata e kap sumbul kepentaren, i bas IA nge kita ndatken/ngaloken pengertin. Emaka kalak si erusaha ndarami kepentaren ku bas pemeteah-pemeteah doni enda, i awang-awang ingan perik kabang seh ku ingan begu ras doni kematen pe labo lit idatkenna amin gia enggo latih akapna ndaramisa. Sabap enterem jelma sikap atena kegeluhenna, tapi ndaramisa i bas ingan si la payo. Erkemalangen man Tuhan me jadi dalam nuju kepentaren e. Tole erpengertin me Jop maka ikatakenna tole guna ndatken kepentaren eme nilahken si jahat gelah ndatken pengertin (ay. 28). Teridah Jop kalak pentar ietehna apai si mehuli ras apai si man tadingenken. Biak kalak jahat la man paken, la man usihen ras la man ikutenken. Guna si eme maka tetap si pebagesi penandaita Dibata arah kinitekenna, setia dengen patuh kita kempak perintah Dibata. Selaku Moria kita tetap mindo kepentaren Dibata guna ndalani wari-wari kegeluhenta, guna ngaturken jabunta segelah tetap kita ngasup engkelengi jabunta bagi singena ate Dibata.